

язву королеви, они же абие ускориша и свергоша его с шнека и с конем в море. И божию благодатью оттуду изыде неврежен. И многажды устремися на короля и не улучися ему дати язвы. И вьеводы же многы оба полы короля разби.

Вторый же — новгородец, именем Збыслав Якунович. Сей бився единым топорком. Николико числом великым от руки его ||паде. А 4

Третий же витязь велми имеа сердечнную остроту, именем Яков, родом сын полочянин и ловчей у князя. Сего князю и мьногим людем метнно зряще: еще бо бе не вси смялися полки ратни. Он же наехав на великий полк на шую руку с единым мечем токмо. Мнози же храбрии полку того устремишася противу ему. Он же крепким сердцем, аки прах развеа ветром — тако он мечем своим, аки огонь пала<sup>е</sup> на вся страны. Прочии же пльку того видевше велику силу его и усътрашишася и побегоша. Князь же великий Александр захвали его и подивися силе его.

Четвертый — новотръжанин, именем Миша. Сий пещь з дружиною своею погуби три корабли римлян.

Пятый же — от слуг его, именем Сава, родом сын володимерец. Сий наехав подсече стль||п шатерный златоверхий великий. Полци же Александровы видеша падение шатра. А 4 об

Шестый же — от слуг его, именем Ратмир, родом сын ярославец. Сий бився пещь. От множества ран паде и скончася.

И сии вся слышав от государя своего великого князя Александра.

Бысть же в время то чудно виднно. Бысть якоже и в предняя дни пре Иезекиилии цари, егда приходил Сиинахирим, асирийский царь, на Иерусалиим. И внезапно изыде аггел господень и избави от польку асирийска сто и шестьсот тысяць. Тако сиа обретошася трупиа<sup>ж</sup> мртьва от арха-аггла божиа обои пол реки Ижжеры, идеже непроходно пльком Александровым. А останок побеже. А трупов мертвых своих наметаша корабли и потопиша || в мори. Князь же Александр великий възвратися с победы, хваля бога, славя своего творца, отца и сына и святаго духа. И повелику же велми дарова честных своих витязей. А 10

И по лете же едином придоша малии немци и от полунощныа страны и възградиша град в отчине Александрове. Князь же великий поиде на них и изверже изо основаниа града, а самех посече. А иных помилова и отпусти бе бо милостив зело паче меры.

По велице же победе Александрове, егда победи короля, в третий же год, в зимне время, поидоша немци на землю его. И да не хвалитя ркуще: <sup>а</sup> «Укорим словесный кий же себе». <sup>и</sup> Уже бо бяше взяли град Пьсков и властили своа посажали, и ркущи себе: «Поидем победим князя Александра<sup>к</sup> и || мем его руками». А 10 об

Уже бо бяше приближися ратнии и почюша стражие Александровы. Князь же великий Александр поиде противу им и наступиша море Чюдское. И бысть им обою вои множество, якоже и отец его Ярослав послал бе ему брата меньшаго Андреа в мьнозе дружине. Также и у князя Александра множество храбрых, якоже древле у Давида царя крещии и силнии. Тако и мужи Александровы<sup>а</sup> испльнишася духа ратна, бяху сердца им, аки лвом, и рекуще храбрии витязи: «О княже наш честный, драгый и милый наш государю, и ныне приспе время положити нам главы своя за тя». Князь же великий Александр възхвали повелику им и пакы рече: «Суди, господи, и разсуди прю мою, от языка велеречива избави

<sup>е</sup> Испр., в ркп. огноपालа.    <sup>ж</sup> Испр.; в ркп. трубиа.    <sup>а-и</sup> Так в ркп.    <sup>к</sup> Испр.; в ркп. Александра.    <sup>а</sup> Испр.; в ркп. Александровы.